


MÈÈSÀ À MUKALENGE

 Diyiisha dya disangulujangana didi Mwaneetu Pearry mutuyiishe anu katanci aka dyangata mu Dîyì dya Nzambi. Mushindu mwine udibi bulelela ne “Twètù tudi twelela Nzambi mikalu ne tukosela Nzambi cikondo; kadi Pende mwikale wa Cyendeleele, ne twètù katuyi mwa kwenza aci to.” Pa nanku, diloolo edi netwangate cintu kampanda cikwabo mpindyewu, mmeesa a Mukalenge.

² Kwènjì bidimu bisatu bîmvwà mwindile bwa kulwaku ekeleeziya mu Tucson, kadi nyêyè ewu apa. Eyo, ke twètù—twètù aba apa. Pa nanku tudi tusakidila Mukalenge, Yêyè nguwwa mwanji kutulekela twindila mu mushindu wa ne tulwe kucyanyisha mpindyewu.

³ Mpindyewu, kudi cintu cimwepele cîndì muswe kwamba kumpala menemene kwa twètù kubanga meesa a Mukalenge, ncyà ne, ndi ngeela meeji ne tukaadi bamone bikumbane mu dituku ditudi ne mwoyi edi, mu mushindu wa ne mu bushuwa bwa bwalu bivwa bikengela twètù kufila (muntu ne muntu) buumuntu bwetu bwònsò kudi Nzambi. Mu bushuwa bwa bwalu bivwa bikengela twètù—twètù kukwacila Nzambi mudimu. Ndi ngitabuuja ne Yêyè mmutubeneshe ne dyandamuna dya buludi ku Mifundu. Anu mudi Mwaneetu Pearry mucifile katanci kakese aka, ne tudi—tudi—tudi pa diine dîbà adi. Katwena bampofo to, tudi—tudi—tudi tumona ne ke patukaadi apa, twáfiki.

⁴ Tudi kabidi mwa kukenzakana ne kumona mushindu udi meeji a buntu ashiyangana ne bantu. Nenku, katwena—katwena mwa kushaala kabidi ntanta mupitepite bule to, tudi bafwanyine kusanganyiibwa mu lupitaadi lwa babuluke anu beetu baa menemene aba, buloba bujima mbufwanyine kusanganyiibwamu. Nwamonu anyi? Pa nanku tukaadi—tukaadi ku cikondo cya nshiikidilu.

⁵ Mpindyewu bu mwalu Mwaneetu Pearry kwoya mwaba awu, pa kumona ne maalu aa mmalelela, pa kumona ne mmalelela, kî mmalu mafwikakaja to. Kî ncintu kampanda citudi anu tudifwanyikijila to. Mbintu kampanda bidi bitupeebwe buludi kudi Dîyì dya Nzambi ne bimweneshiibwe kumpala kwetu ne bantu bònsò badimwene, mu mushindu wa tumanya ne tukaadi apa. Kadi katwena—katwena bamanye ne ntoo ne ku dîbà kaayi to, kabidi bwalu tudi anu twenza kwalukila ku dîbà dya ku diboko, nudi numona's, ne tukaadi dîbà kaayi. Kadi tudi...tudi bamanye ne tukaadi—tukaadi apa, tukaadi pa dîbà mene. Nansha ciikale dîbà dya Nzambi, ndi mwa kudifwanyikijila ne... .

⁶ Muntu mukwabo uvwa mufile ditaata dikese dya maalu musangu kampanda divwa dyamba ne bu Nzambi mumwitabileku bilondeshile... bu ne Yêyê uvwa mwa kwabanya bikondo, bidimu ci—cinunu bidi anu dituku dimwe. Pa nanku bu muntu mwa kulaala bidimu makumi mwandamutekete, mbifwanyine kwikala anu ndambu wa tusunsa twa dîbà dya Nzambi. Nwamonu anyi? Ee, ke kwambaye ne bu biikale bidimu makumi anaayi, aci kî ncifwanyineku nansha kwikala bu ne ndîbà to, nansha cibwîpi, divwa Yê mufwanyine kutuuta Wende mupodi. Nwamonu anyi? Nwamonu's, anu mushindu awu ke udîbi biya lubilu, cintu cyônsò mu kaabujima, bu ne divwa ndîbà dyabanya; bidi ne, Yêyê kêna ne dîbà diine to. Pa nanku Yêyê udi anu wa Cyendelelee.

⁷ Ngeela meeji ne uvwa n'Sarah udi lwa paanyima pààpa wawa... anyi, to, uvwa n'Joseph, diloolo dikwabo, ungambila mêmè ne Mwaneetu Pearry. Kwambaye ne: "Papa, mpenyi, Nzambi ewu wakabanga kwikalaku mu cyalu dîbà kaayi? Yêyê mwine mmufumine penyi?" Nwamonu anyi? "Yêyê's uvwa ne cya kwikalaku ne ntwadijilu, kî mmwômò anyi? Kawwaku Yêyê ne cya kwikala mubange anyi?"

⁸ Mêmè ne: "To. Cyônsò cidi ne ntwadijilu cidi ne ndekeelu, kadi civwa kaciya ne ntwadijilu aci ke cidi kaciya ne ndekeelu." Mu bushuwa bwa bwalu, yêyê udi ne bidimu dikumi, aci civwa cyenze anu bu ci—cipese cya nshima cimupite muminu bunene's. Nwamonu anyi? Ne yêyê mwine mmunyi mudiye mufwanyine kwitaba ciine aci, umanya ne cintu kampanda kacya kacituku cyanji kubanga? Kî ng'anu yêyê nkaayende to, nansha kûndî mêmè. Mpindyewu, nwamonu's, cidi anu cintu cinene menemene bwanyi mêmè, muvwa ciine aci cifike ku dibanga.

⁹ Mpindyewu tukaadi baswe kwenza cintu kampanda mwaba ewu cidi cinsantu cya bushuwa.

¹⁰ Bavwa bambiikile kukaadi ndambu wa matuku, kwa beena Kilisto kampanda baa maalu malenga batu—batu kabayiku banji kwangata cyôci eci to, kadi mmuumvwe bamba ne twêtù tutu twangata meesa a Mukalenge kantu ne kantu. Bôbò batu baangata mudibo baabiikila ne "bwobumwe bwa nyuma." Ne byôbi biine, bwa bidi bitangila *bwobumwe*, ndi mufwanyine kwamba ne mmwômò, bwalu *kwambilangana maalu* kutu "kuyiikilangana ne," nwamonu's. Ke mwaneetu awu kumpaye Mufundu ewu, kwambaye ne: "Mwaneetu Branham, kwênàku peebe wela meeji mpindyewu ne..."

¹¹ Mpindyewu, kabingila kândî ngambidila cyôci eci... S'mmwômò's, Mwaneetu Pearry? [Mwaneetu Pearry Green udi wandamuna ne: "Menemene."—Muf.] Nwamonu's, kabingila kândî ngambidila cyôci eci, mbwa nwamona mwa kuumvwa cinudi nwenza. Kanwena... wêwê ubwela mu cintu kampanda mubwite kwîsù, kuyi mumanye ne mpenyi to, cyûdî wenza ne

ncinyi. Kwèna nansha mwa kupeta dyeyemena to pawikala kuyi mumanye cyùdi wenza. Kadi udi ne cya kuumvwa cyùdi wenza ne bwa cinyi udi ucyenza.

12 Kwambaye ne: “Mpindyewu twètù twangata Dìyì dya Nzambi, kî n’Nzambi utudi twangata awu anyi?”

13 Mèmè ne: “Ncya bushuwa menemene, mukalenge, ncilelela. Kadi tudi tubala apa ne bavwa bulelela. . . Pòlò wakalongesha dyangata dya didya dya Mukalenge dya kantu ne kantu. ‘N’wikale nwenza nunku bwa kuMvuluka,’ mwakamba Yesu. ‘Misangu yònsò inwabyangata bwa kuMvuluka, nudi nuleeja lufu lwa Mukalenge too ne paalwaYe.’” Nwamonu anyi? Mpindyewu, bidi bikengela bwa twètù kuàngata.

14 Tudi tuumvwa ne Munsantu Pòlò, yèyè mene wâkatùma dîyì adi mu Ekeleeziya awu, mwikale muprofeta wa Dipungila Dipyadipya. Peetelo, Yakobo, Yone, bôbò bònsò, baakafunda (mona’s, Maataayi, Maako, Luuka) byakenza Yesu, bu bafundi. Kadi Pòlò yèyè ngwâkatèeka cintu aci mu bulongame, yèyè nguwva—yèyè nguwva muprofeta wa Dipungila Dipyadipya. Anu mwakaya Mòsà mu cipeela bwa kupeta disonsodiibwa bwa kufunda Mi—Mikanda itaanu ya—ya. . . Mikanda itaanu ya kumpala ya Bible, ee, Pòlò pende wakaya mu cipeela bwa kupeta disonsodiibwa dya kudi Nzambi, bwa kuteeka Ekeleeziya wa Dipungila Dipyadipya mu bulongame ne kuDifwanyikija ne Dya kale.

15 Mu cyòci amu bavwa ne mwânà wa mukooko wa mulambu, civwa Izaleela mulame bu civulukilu. Ncya bushuwa ne cyòci aci cyakenjiibwa musangu umwepele, ku dipatuka dya mu Ejipitu. Kadi pashiishe baakashaala balame aci bu civulukilu too mu cikondo cijima. Ee, “piikalabi ne mikenji iwva mundidimbi wa maalu avwa ne cya kulwa,” nudi numona’s.

16 Mpindyewu, mèmè ndi bulelela ngitabuuja ne *meesa a Mukalenge* (citudi tubiikila ne “meesa a Mukalenge” aci, mpindyewu) adi ne cya . . . adi “ndidya dya Mukalenge.”

17 Mpindyewu, tudi ne mèyì matuma a Nzambi anu asatu a mu mubidi emu: dimwe dya ku òwò didi—didi meesa a Mukalenge; dyoweshangana dya mâyì ku makàsà; dibatijiibwa dya mu mâyì. Bidi anu bintu bisatu abi. Ke bupwangane mbwòbò abu, bwa isatu, nwamonu’s. Anu awu ke mèyì matuma asatu atudi naawu. Tudi tufika ku dyumvwa ne ke bintu byakafidiibwa kudi Pòlò Munsantu mu Dipungila Dipyadipya.

18 Mpindyewu, bu twètù mwa kwamba ne “meesa a Mukalenge adi ne cya kwikala anu dyangata dya Dìyì nkaayaadi,” ncyèna ngitabuuja ne muntu udi ne bukenji bwa kwangata didya dya Mukalenge padiye kayi mwanji kwangata Dìyì dya Mukalenge munda mwa mwoyi wende to. Nwamonu anyi? Bwalu nèngikalè mwa. . . Nènnùbadilè cintu kampanda mu tusunsa tukese emu

nenku nenumone. Mpindyewu, monaayi. Pashiishe, mbwa cinyi butudi bafwanyine—butudi bafwanyine. . .

¹⁹ Pa nshindameenu umweumwe ewu kakuyi mpatà to tudi bafwanyine kumbingisha beena Armée du Salut. Bòbò kabatu biitabuujaku mushindu kana wònsò wa dibatiiza dya mu mâyi to, batu bambe ne: “Katwena naadi bwalu to.” Mpindyewu, patwikala katuyi bwalu ne dibatiiza dya mu mâyi, tudi tubatiijibwa bwa cinyi? Mbambe ne: “Mâyi kaena mwa kukusungila to, Mashi ngadi akusungila.”

²⁰ Nêntwe ku cyôci aci. Aci—aci ncyà bushuwa, Mashi ngadi akusungila, kî mmâyi to. Kadi tudi *ne cya* kwangata mâyi bu disaluka dya pambelu dya ne mudimu wa munda wa ngâsà mmwenjiibwe. Nwamonu anyi? Mushindu umweumwe awu ngutudi ne cya kwangata meesa a Mukalenge!

²¹ Patukaadi bamane kwangata Mukalenge, Mulambu wetu, munda mwetu, bu Dilediibwa dya nyuma munda mwetu, ne Mubidi Wende, tudi ne mwoyi ku Yêyè ku Dîyi, bivwa kabidi bikengela twêtù kucileeja mu cimfwanyi bwalu mmukenji. “Nyingalalaayi, muntu ne muntu wa kunudi, ne nubatiijibwe mu Dîna dya Yesu Kilisto bwa dilekelediibwa dya mpekaatu yenu.”

²² Pòlò mmwambe ne: “Ndi mupete kudi Mukalenge cîndi paanyi munusambulujile aci ne: ‘Mukalenge Yesu bufuku bumwebumwe bwakaMupangilabo abu wakangata dyâmpà, ne wakadicibula ne wakadipa bayiidi, ne—ne wakamba ne: “Angataayi nudye, nwikale nwenza nunku bwa kuMvuluka.” Bwalu misangu yònsò inudi nwangata dyâmpà edi, nudi nuleeja lufu Lwende too ne paalwaYe.” Mpindyewu tudi tujandula ne, mu cyôci aci, bavwa ne bantu bàvwà bàlwa. . .

²³ Mwaneetu wa balume wa mushinga mukole ewu, mwaneetu wa mushinga mukole, wawalwa ne wakamba ne: “Kacya ncitu—kacya ncitu mwanji kucyangataku to, Mwaneetu Branham, ncyèna ngumvwa ne ncinyi to.” Yêyè ne: “Batu bandongeshe mêmè mmwenenu mukwabo.”

²⁴ Mêmè ne: “Kadi uvuluke ne, netwitabe ne Pòlò Munsantu wakaciteeka mu bulongame mu Ekeleeziya wa beena Kilisto wa ku cibangidilu. Bavwa buumuka ku ekeleeziya . . . ku nzubu ne ku nzubu, bacibula dyâmpà ne bupwekele bwa mwoyi, ne bikwabo. Mpindyewu,” mêmè ne, “ncyà bushuwa ne yêyè wakaciteeka mu Ekeleeziya. Galatiya 1.8, mmwambe ne: ‘Mwanjelo ufumina mu Dyulu mulwe mwambe cintu cikwabo, ediibwe mulawu,’ wamonu’s, wamonu’s, yêyè umweumwe wâkabâmbila bwa kubatiijibwabo cyakabidi paanyima paa dibatiiza dya Yone awu, bwa kubatiijibwabo mu Dîna dya Yesu Kilisto.”

²⁵ Nudi numona, kudi bintu bisatu bitudi ne cya—bintu bisatu bitudi ne cya kwenza bu bimfwanyi: Didya dya Mukalenge,

dyoweshangana dya mâyi ku makàsà, dibatiiza dya mu mâyi. Nwamonu anyi? Kudi. . .

26 Wêwè udi wamba ne: “Ee, kùdì. . .” Mpindyewu, beena Armée du Salut badi bacyangacila pa mmwenenu ewu wa ne: “Mwîvi ukààvwa upùnga ne lufu awu, paakafwaye, kavwa mubatijiibwe to, kadi’s Yesu wakamba ne neikale mu Dyulu.” Aci mbulelela menemene. Aci mmudici. Kadi, nudi numona, yêyè—yêyè—yêyè wakajingulula Yesu anu mwaba mene awu mu dîbà dikaavwaye ufwa adi. Nwamonu anyi? Ke wende pende—ke wende pende mpunga wâkapetayè nyêyè awu. Yêyè—yêyè uvwa mwîvi, uvwa kule, uvwa pambelu. Kadi yêyè, mmwenze anu umona Bukênkè abu, yêyè kuBujingulula ne: “Mukalenge, wamvulukaku!” Ke Yesu. . . Bwa aci’s civwa cilelela.

27 Kadi wêwè ne mêmè bàdi bamanye ne bidi bikengela twêtù kubatijiibwa aba, kadi tubenga bwa kucyenza, pa dîbà adi aci’s neciikale anu pankaci peebe wêwè ne Nzambi. Mbya mwomumwe ne meesa a Mukalenge!

28 Mpindyewu, patudi twangata meesa a Mukalenge aa, kacyena anu cintu cya kwamba ne: “Ndi ndwa kaaba aka ne nêndye dyâmpà, nenku nêngitabuujè ne ndi mwena Kilisto” to. Kadi, panwikala bamone, Bible mmwambe ne: “Ewu udi uद्या ne unwa *kayi mukumbanyine* to neikale mupiile ku Mashî ne Mubidi bya Mukalenge.” Nwamonu anyi? Bikengela wikale ne nsòmbelu udi—udi. . . kumpala kwa bantu, udi. . . ne kumpala kwa Nzambi ne kwa bantu, udi uleeja ne wêwè udi—ne wêwè udi ne meeji matooke.

29 Mpindyewu, anji indilaayi kabidi katanci. Mpindyewu, mu Dipungila Dikuluku paakenjiibwa mulambu bu dîyi anyi mukenji. Ke mudibi kabidi ne dibatiiza dya mu mâyi mmukenji; ke mudibi kabidi ne dyoweshangana dya mâyi ku makàsà mmukenji; ke mudibi kabidi ne didya dya Mukalenge mmukenji. “Wa disanka ng’ewu udi wenza mikenji Yende yònsò, udi ulama mêyi Ende ònsò, mikenji Yende yònsò, bwa kupetaye bukenji bwa kubwela mu Muci wa Mwoyi.”

30 Mpindyewu, monaayi mu eci mpindyewu, mu cya kumpala aci, pavwaci mukenji wa Nzambi bwa musangu wa kumpala bwa kulwa ne mulambu ku ekeleeziya, ne ku ntempelu ne ku cyoshelu, ne kulambula dipà dyebe, ne—ne bwa mpekaatu yebe, mulambu wa mwânà wa mukooko. Ee, ndi anu mwa kudifwanyikijila mmona mwaneetu kampana wa beena Yuda upweka ne njila, mumanye ne mmupiile, nenku mwikale uya ku cyoshelu; anyi ulwa ne ngombe wende wa maanyi anyi cimpanga cya ngombe, anyi cyònsò civwaye naaci aci, anyi cimpanga cya mukooko, mwânà wa mukooko, cintu kampana. Uvwa mulwe naaci kuntwaku wenda upweka ne njila mwikale ne meeji matooke ne mwende mwònsò, usemena kuntwaku, ulama mukenji wa Nzambi ne meeji matooke ne mwende mwònsò.

³¹ Pashiishe uvwa utentekapu byanza byende, utonda mpekaatu yende, ne mwakwidi mwikale wela (mpekaatu yende) eyi pambidi paa mwânà wa mukooko awu, ne muminu wa mwânà wa mukooko awu uvwa ukoshiibwa, ne—ne pashiishe ufwa pa kaaba kende yêyè. Pavwaku kalaadika mwaba awu apu, kânà kaa mukooko aku kàsuba tukono ne kàmata mashi, byanza byende bitampakane mashi, ne ôwò miikale amusompokela pambidi pajima (kânà kaa mukooko kakese aku kiikale kadila, kâpunga ne lufu), yêyè uvwa mwa kufika ku dyumvwa ne yêyè nguvwa mwenze mpekaatu kadi bikengela cintu kampana cifwe pa kaaba kende. Ke bwa cinyi, uvwa ulambula lufu lwa mwânà wa mukooko ewu pamutu paa lufu lwende yêyè. Nwamonu’s, kânà kaa mukooko aku kavwa kafwa pa kaaba kende yêyè. Pa dîbà adi muntu awu uvwa mucyènzè ne meeji matooke, ne ndondo wa mwoyi wende.

³² Ndekeelu wa byònsò, misangu ne misangu kuyabi kabidi nanku, misangu ne misangu kutungunukabi too kadi ndekeelu wa byònsò kushaalabi cilele. Mukenji wa Nzambi kushaalawu cilele kudi bantu. Nenu pashiishe ke yêyè udi upwekaku ewu: “Ee, twânji tumonebi’s, leelu ewu’s mmu dituku *kampana*, pàmwäpa bikengela mpweke’s. Eyo, bikengela ndambule ci—cimpanga cya ngombe.” Uvwa upweka: “Ee, Mukalenge, ke cimpanga cyanyi cya ngombe ncyôci eci.” Nwamonu’s, kamwena meeji matooke to, kamwena dyumvwa to.

³³ Mpindyewu, katwena baswe kwangata meesa a Mukalenge mushindu awu to. Cyôci cintu cimwecimwe aci ncikaadi cyenzeke bwa Meesa a Mukalenge.

³⁴ Yeshaayi 35...To, numfwilaayiku luse. Yeshaayi 60... Lekelaayi ngangatulule cyôci aci. Ndi—ndi—ndi ngeela meeji ne n’Yeshaayi 28, ke mutudi tupeta cyôci eci. Ndi mutwishiibwe menemene ne ke yêyè nshapita awu. Mmwambe ne: “Bidi ne cya kwikala kanungu pa kanungu; ne mulongo pa mulongo pa mulongo; ndambu apa, ndambu pàapa. Kwataayi bikole ku cidi cîmpè. Ku mishiku idi ikukumina ne mu myakulu mikwabo ke kûNgààkwilà ne bantu aba. Ne Diikisha ndyôdi edi.”

³⁵ Mmwambe ne: “Meesa ônsò a Mukalenge akaadi mûle tente ne bilushi. Nganyi ûndi mwa kulongesha Dilongesha? Nganyi ûndi mwa kufikisha ku dyumvwa?” Nwamonu anyi? Ngeela meeji ne Mufundu menemene uvwa ngwôwò awu, Yeshaayi 28. “Nganyi ûNdi mwa kufikisha ku dyumvwa Dilongesha?” Nwamonu’s, “meesa...”

³⁶ Mpindyewu, tudi tujandula leelu ewu ne cintu cinene citudi pabwipi ne kwenza diloolo edi eci, bwa kuvuluka lufu Lwende ne Mubidi Wende utudi twitabuuja ne ngutudi tudya ku dituku ne ku dituku awu, anyi, utwâfumu ku didya pavwa mwaneetu utuyiisha apu awu. Kwangata kwa Dîyi dya Nzambi, tudi tuDiitabuuja ne mwoyi wetu wònsò. Tudi tuDimona

dimweneshiibwe; tudi tuDimona ditupeebwe; tudi tuDimona dishindikiibwe; tudi tuDyumvwa mu nsòmbelu yetu. Ne tudi ne cya kulwa ku eci ne ndondo wa kondo kaa mwoyi kaa citudi twenza, kaciyi anu ne bwalu ndíyi dituma nansha.

³⁷ Nudi nubwela mu ekeleeziya, ne misangu yàbùngì badi baabanya cisukwita cya mukèlè cya kale anyi cintu cya—cya mushindu kampanda, bacicibula, ne kaadyàmpà kapeepele anyi—anyi cintu kampanda, ne—ne bakacibula; ne bantu bàtù bànwà mfwanka, banwa maala, ne bikwabo byònsò, anu ne bwalu ncidimba cya ekeleeziya mwikale ulwa wangata didya dya Mukalenge. Ee, aci's mbukooya kumpala kwa Nzambi!

³⁸ Nansha mulambu mwine, s'baakamba ne: “Matuku enu a cijila awu ne mulambu wenu bikaadi bilwe mupuuya mubole mu dyùlù Dyanyi.” Kadi Yèyè's nguvwa mubatumine díyi bwa kwenzabo mulambu mwine awu. Kadi mushindu uvwabo bawangata's, ukaavwa mulwe mupuuya mubole, dikaci mu dyùlù Dyende (mu mimpempe Yende), mulambu mwine wakabatuminaYe díyi awu.

³⁹ Ke mushindu utukaadi twangata Díyi dya Nzambi, beena Kilisto bapitepite búngì leelu ewu (bàdì badyàmbà's) badi benza nanku awu. Tudi twimana kaaba aka tulongesha Díyi edi, twamba ne: “Yesu Kilisto kèna umweumwe awu makeelela, leelu, too ne kashidi to,” ne tuiisha bintu byakatulayaYe ne Yèyè neabitwe mushinga abi, twamba ne: “Kaa, ee, aci's civwa mbwa cintu kampanda cikwabo,” dikuukwila dyetu dya dísù dyumisha adi dikaadi dilwe mupuuya mubole mu dyùlù Dyende. Yèyè mwine kaakudyanyishaku to, nansha bishi. Ke kabingila nkòkò aku, ku biibidilu byetu bya kaabukulu!

⁴⁰ Kwèna wangata didya dya Mukalenge byenze bu cilele to. Udi udyangata bwalu ndinanga dya Nzambi mu mwoyi webe, mu kulama kwa mikenji ya Nzambi. Nwamonu's, ke bwa cinyi udi udyangata.

⁴¹ Pa nanku pawikala kuyi udyangata ne meeji matooke to, ciikala anu bu cilele ne: “Ee, ekeleeziya wetu nyawu utu wenza meesa a Mukalenge musangu umwe mu dyalumingu dyònsò, anyi musangu umwe ku ngondo yònsò, anyi misangu ibidi ku cidimu,” nenku useemena, wamba ne: “Ee, ke wanyi musangu ngewu,” ne—ne pashiishe wangata meesa a Mukalenge, mona's, aci's mmupuuya mubole bwa Nzambi! Nwamonu's, aci's cidi anu cilele.

⁴² Nansha bu cintu cikwabo cyònsò eci, s'bidi bikengela wèwè—wèwè kwikala ne meeji matooke. Nzambi mmuswe ndondo wa mwoyi webe. Wavuluka ne, anu Nzambi mwine udi mukufikishe pa buloba apa awu ke Yèyè ùdì ukwacila mudimu awu. Nwamonu anyi?

⁴³ Udi wenza cyòcì eci bwalu Yèyè ngudi mwambe nanku, bwalu ndíyi Dyende dituma. Pa díbà adi tudi baswe kuseemena

ne ndondo wa meeji matooke, bamanye ne ku ngàsà wa Nzambi nkutudi basungidiibwe. Nenku tudi—tudi baMunange ne tudi bumvwe Bwikadi Bwende, ne tudi—tudi tumona mudiBu bushintulula nsòmbelu yetu. Buumuntu bwetu—bwetu bwònsò nkòong mbushintuluke. Tukaadi—tukaadi—tukaadi bantu bashiilangane. Katucyena ne nsòmbelu utuvwa nende pa ciibidilu awu to, katucyena twela meeji mutuvwa ne ciibidilu cya kwela amu to.

⁴⁴ Anu mudibi mu Mukanda emu, ne kaaba katuvwa twakwila twamba ne Mikanda i—ibidi ayi idi Umwepele aku, Mukanda wa Mwoyi. Mukanda wa Mwoyi wa kumpala upatuka, mpawakalediibwa, aci civwa ndilediibwa dyebe dya mubidi. Nwamonu anyi? Kadi pashiishe musangu kampanda, munda menemene mwamwa, muvwa kaalutete kakese kaa Mwoyi mûmvwà ngumvwija bamwe baa ku bânà beetu batekete baa bakaji kwanyi kumbelu mu mapingaja emu. Nwamonu's, kudi kaalutete kakese kaa Mwoyi kiikale kasanganyiibwamu, mu mushindu wa udikonka ne: “N’Kafume penyi? Ebi bintu bya pabwabi bidi mbinganyi—mbinganyi?”

⁴⁵ Mvwa ngamba cyòci eci, ndyangata mêmè mwine, byenze bu ne wêwè uvwa mwa kwamba ne: “William Branham, ee, kukaadi bidimu makumi anaayi, ewu William Branham, kacylene yêyè umwèumwè awu diloolo edi to.” Bu muntu kampanda paanyima pààpa mufwanyine kwamba ne: “William Branham, yêyè's uvwa muntu mubule kaneemu wa dikema,” nwamonu's, bwalu ndi mulela kudi Charles ne Ella Branham. Mu ngiikadilu wabo bôbò mvwa ngènzàmpèkààtù, ndi mulwe pa buloba, mwena mashimi, ne biibidilu byònsò bya pa buloba biikale bisòmbè anu munda mwanyi. Kadi munda menemene mwamwa, kabidi, Ngiikadilu mukwabo uvwamu, nwamonu's, mudyanjila kulongolola, muteekamu kudi Nzambi. Mu mubidi umweumwe ewu, nwamonu's, mwikale ngiikadilu ibidi.

⁴⁶ Ee, mvwa ndifila anu ku umwepele. Pavwayi wenda ukola, mvwa ngenza mutooyi bu mwânà wa mu diboko ne: “Dad-da.” Katanci aka, mêmè kulwa mwena mashimi, kulwa bikwabo byònsò bitu ngènzàmpèkààtù mwikale abi, bwalu mvwa mukole mu mushindu awu. Kadi munda amu mukaavwa katoba kakese kaa Mwoyi kwine kwònsò aku.

⁴⁷ Mvwa anu ne ciibidilu cya kuvuluka, pâmvwà mwânà mutekete. . . (Ndi ntekemena ne ncyèna nnulama mukùngùlù mupitepite bule to. Kadi bu mudibi ne. . .) Musòmbè pambelu mu. . . ku—ku mwelelu kwa kasulu, nenku mvwa mwa kwikala musòmbè mwaba awu mwikale ntangila eku ne eku mu mêmè a bufuku. Papa ne maman, bakaadi patudi twakulangana apa baye ku diikisha dyabo. Kadi mu miine matuku awu bavwa bangènzàmpèkààtù, kakuvwaku bwena Kilisto nansha bwa kânà mu yetu mbanza to. Nenku, kaa, ekelekele, dinwa dya maala, mafesto, ne maalu a lukutukutu; bivwa bingendesha

mémè ku mwoyi, mvwa mwa kwangata mwêndù wanyi ne mbwa wanyi nya mwitu, bwa kushaalamu bufuku bujima. Mu cikondo cya movù wa mashika mvwa mwa kutwa buluwà too ne pavwa fête ujika, pâmwâpa mu dinda pavwa kwîsù kutooka. Pâmvwâ ngalukila kumbelu, fête yêyê kayi mwanji kujika to, mvwa nkadyadija kuulu kwa citanda kampanda ndaalaku, mwindile bwa bufuku kucyabu.

48 Pashiishe mvwa mwa kwela meeji ku mushindu wa biine bikondo abi, pa dîbâ adi mwikale mupatuke muye kwine aku mu cikondo cya movù wa luuya, ngangata tuumici twanyi ntwasa panshi bwa civwa mwa kunjikaku ku lupeepele, pavwaku mwa kwikala kumate mvula; kudyadija mwaba awu mwikale muteeke mikoolo yanyi ya ndobo mu mâyi, mwikale ndoba mishipa; mbwa wanyi wa buluwà bwa nshimba mwikale mulaale mwaba awu. Mvwa mwa kwamba ne: “Tangila kuneeku. Udi mumanye ne, mu movù wa mashika mushaale ngâkaasa cituudilu anu mwaba ewu mene bufuku kampanda, mémè kuteemesha mudilu anu mwaba ewu mene pâmvwâ mwindile mbwa wanyi wa kale ewu bwa kusakaye nyama mu mucu, nenku mémè kuteemeshila mudilu mwab’ewu. Nêjê uvwa mukwate dibwe too ne mu ndondo wa byâlâ bitaanu [cm 12,7] mu buloba. Kadi, wêwê kaacilongo kakese aka, wafuminyi penyi?” Nwamonu anyi? “Ee, kadi kûdî mufwanyine kwikala mufumine nkwêpi? Udi mupatuke mulwe kukukuna kaaba aka nganyi? Ne mbapatuke neebe mu nzubu kaayi wa luuya? Anyi—anyi bwalu budi cinyi, kûdî mufwanyine kwikala mufumine nkwêpi?” Nwamonu anyi? Kaacilongo kakese aku, mvwa mufwanyine kwamba ne: “Mona’s, nêjê nyewu uvwa mukwate dibwe, ne bikwabo, ne mémè muteemeshile mudilu lwa kuulu eku. Pa kuumusha cintu citu civwija nêjê dibwe aci, kuvwa citu cifila luuya lukole ciikale mwaba ewu pa lukunyi lunene lwa kale pâmvwâ mukooshile. Kadi nansha nanku ke wêwê ewu, cibi mwikale ne mwoyi. Kûdî mufwanyine kwikala mufumine nkwêpi?”

49 Civwa ncinyi? Ke William Branham mukwabo nyêyê awu. Nwamonu anyi? Katoba kakese kaa Mwoyi wa Cyendelele munda amu, kaa—kaa—kaa mu ngiikadilu ya Nzambi, Dîyi dya Nzambi divwâ diteekiibwe muntwamu. Yôsò wa kunudi udi mwa kwela meeji a bintu bya mushindu wa mwomumwe awu. Nwamonu’s, Divwa munkaci mwa dikwata mudimu.

50 Pashiishe ntangila kuulu ku mici, ngeela meeji ne: “Wêwê dibеji, mvwa mukumone umata cidimu cishaale, kadi mbwa cinyi ukaadi mwalukile cyakabidi aku? Kûdî mufwanyine kwikala mufumine nkwêpi? Cidi cikufikishe apa ncinyi?” Nwamonu’s, Civwa m’Mwoyi wa Cyendelele awu mwikale ukwata mudimu mu mubidi.

51 Mpindyewu, pashiishe dituku dikwabo mémè mutungunuke ngenda nya, Dîyi adi dyakula ne: “Kunu mfwanka, kunu maala

to, ne bikwabo.” Ne bansonga naanyi ne bônso kukolabo. Nwamonu’s, kuvwa Cintu kampanda cikwata mudimu.

⁵² Kadi nansha nanku mêmè kubanduluka dyakamwe, mêmè kwamba ne: “Mêmè ncyêna mwânà wa Charles ne Ella Branham to. Kudi Cintu kampanda cibiikila.” Byenze bu kaamukanku kaanyi kakese aku ne: “Mêmè ncyêna nzoolo to. Kudi Cintu kampanda muulu mwamwa, mwaba kampanda. Éyi Yehowah Munene wè, nansha Wêwè mwikale Nganyi, kanguka! Ndi muswe kwalukila kumbelu. Nyewu kudi Cintu kampanda munda mwanyi emu, cibiikila.”

⁵³ Pa dîbà adi mêmè kulediibwa cyakabidi. KaaMwoyi kakese aku kavwa kateeka mwaba awu, mwoyi wa mâyi uvwa mupongolwela pa Kôkò aku, ke Kôkò kubanga kukola. Mpindyewu, ke mwoyi mukulukulu awu kufwidiibwawu luse, kwediibwawu mu mbû wa cipwamwoyi wa Nzambi, bwa kayiku mwa kuwuvulukaku kabidi bwanyi mêmè nansha. Nwamonu anyi? Mpindyewu tukaadi biimane babingishiibwe (byenze bu ne kacya katutuku benze mpekaatu to) mu Bwikadi bwa Nzambi.

⁵⁴ Pa dîbà adi patudi tulwa ku meesa a Mukalenge, tudi ne cya kulwa mu kaneemu kaa menemene, dinanga ne kaneemu, kaa ne “Mona kutuwwa mwa kwikala basanganyiibwe bu kabuyi Bwende Yêyè.” Nwamonu anyi? Monaayi ne mpenyi pavwabi bifwanyine kwikala . . .

⁵⁵ Ke bwa cinyi, Pôlò, ngeela meeji, mu kwamba kwa eci ne: “Ke bwa cinyi, panudi nudisangisha bwa kudya, indilanganaayi muntu ne mukwende.” Mbwena kwamba ne, mu ngaakwilu mukwabo, kwanji kwindilaku ndambu wa tusunsa, kusambila, kudikenketa wêwè mwine. Ne pawikala mumanye ne mwaneetu kampanda udi munda amu, mwikale pabwîpî ne kwenza cintu kampanda cidi cibi, anyi cintu kampanda, nenku wêwè umusambidileku pende, yêyè awu. Nwamonu anyi? Nwamonu’s, “indilanganaayi muntu ne mukwende,” kwanji kwindilaku ndambu, kusambila. Piikalaku meeji anudi nuumvwilangana munkaci mwenu anyi cintu kampanda, ku—kucyênji nansha—kucyênji nansha, anji nda ukalongolole bwalu abu, dyambedi. Nwamonu anyi? Anji nda ukalongolole bwalu abu, dyambedi, bwalu tudi baswe kulwa apa biikale bakezuke ne mwetu mwônso, ne meeji etu atudi twelelangana muntu ne mukwende ne bwa Nzambi, ne bwa muntu ne mwinende, nenku pashiishe tudi tulwa mu dyumvwangana banyungulukile meesa a Mukalenge. Nwamonu anyi?

⁵⁶ Nenku tudi twenza cyôci eci bwalu tudi tuMwela twasakidila, ne munkaci mwetu muntu ne mukwende. Tudya dyâmpà munkaci mwetu muntu ne mukwende, tunwa mvinyo munkaci mwetu muntu ne mukwende, bu Mashî Ende ne Mubidi Wende.

57 “Nwênù kanuyi nudya Mubidi wa Mwânà wa muntu ne nunwa Mashì Ende to, kanwena ne Mwoyi munda mwenu to.” Nwamonu anyi? Nudi numona’s, ke cyôci aci cidì Bible mwambe. Paudi kuyi ucyenza to, kamwenaku Mwoyi to. Nudi numona anyi? Pa dîbà adi, mu mushindu kampanda anyi kansanga, udi uleeja mùdì ne bundu bwa kudifwanyikija bu mwena Kilisto, bwa nsòmbelu wùdì nende awu. Ne pashiishe eci bulelela cidì nditeetangana dya makanda. Pa dîbà adi wêwè kuyi ucyenza to, kwèna ne Mwoyi nansha. Wêwè ucyenza bushuwa kadi kuyi mukumbanyine to, udi mupiile ku Mubidi wa Mukalenge.

58 Ncintu cimwecimwe aci bwa dibatiiza dya mu máyì. Twètù twamba ne: “Tudi biitabuuje Yesu Kilisto, Yèyè mmutusungile ku mpekaatu, ne tudi babatiijibwe mu Dínà dya Yesu Kilisto,” mona’s, tudi tufwisha—tudi tuMufwisha bundu, twenza bintu bidì bibi ne nebikengele twètù—twètù kuyooba bwa bwalu abu. Ne cintu cikwabo, patudi twenza cyôci aci apu, tudi munkaci mwa kuteeta kujikula cintu kampanda paabi biikale twenza cya cyanaana.

59 Ke lutatu lutudi naalu leelu ewu ndwòlò alu. Cîndì ngeela meeji. . .Pândì ngamba ne “twètù,” mêmè, ne ekeleeziya udi Mukalenge Nzambi mundekeele bwa mêmè kuyiisha mu mêtà a ndekeelu aa ne, tudi twitabuujà ne tudi mu cikondo cya nkomeni. Tudi twitabuujà ne Nzambi mmutupe Mukenji. M’Muteekiibwe kudi Nzambi, m’Mujaadikiibwe kudi Nzambi, m’Muleejiibwe kudi Nzambi. Mpindyewu tudi ne cya kulwa kudiYe ne kaneemu ne dinanga, kabidi ne—ne bukezuke bwa mwoyi ne bwa meeji ne bwa musuuka.

60 Nudi bamanye, dîbà nedilwe kataataka diikalabi—diikalabi anu munkaci mwetu mene emu. . .Nyuma Mwîmpè wakula anu pa butooka mwakaakulaYe bwa Ananiya ne Saafila. Nwamonu’s, vulukaayi ne, dîbà adi dikaadi pa kufika. Nwamonu anyi? Nenukù tudi. . .Mpindyewu, ikalaayi anu bavuluke cyôci aci, nwamonu’s, ne Nzambi neikale musòmbèle munkaci mwa cisamba Cyende. Ke cidìYe muswe kwenza mpindyewu.

61 Tudi mwa kwakidila Mukenji, bu mudi kwamba ne. . . Bu ne ncicivwa nsongalume ne—ne mwikale ngenda nkeba mukaji, ne bu mêmè mwa kupeta mukaji, ngamba ne: “Yèyè’s mmupwangane anu menemene. Mmwena Kilisto. Nyinábànzà. Yèyè’s udi byònsò ebi, ndi mmweyemena.” Nansha mêmè mumweyemene bishi, nansha mêmè ngeela meeji ne mmulenga wa bishi, bidì bikengela mmwitabe, bidì bikengela bwa yèyè angitabe; nwamonu’s, biimanyine pa micipu eyi.

62 Ee, ncintu cimwecimwe aci citudi tusangana ne ke cidì Mukenji. Tudi tumona ne Wòwò ngwa cya bushuwa. Tudi tumona Nzambi ushindika ne Wòwò ngwa cya bushuwa. Ngwa cya bushuwa menemene. Ku cidimu ku cidimu, ku cidimu ku cidimu, Wòwò udi utungunuka anu bikumbanangane,

utungunuka anu bikumbanangane. Cyônsò cidiWu wamba, cidi cyenzeka menemene anu mudiYe mwambe. Mpindyewu, tudi bamanye ne Wôwò ngwa cya bushuwa, kadi, nwamonu's, kwikadi ucyenza ne mmwenenu wa dimanya dya mu mutu nansha. Wêwè mwenze nanku, udi mupete ntendelelu mukukombwela. Nwamonu anyi? Twêtù katwena baswe ntendelelu mutukombwela nansha, cintu kampanda cikaadi muntu mukwabo mumane kulabula kadi twêtù biikale ne mwoyi ku bujaadiki bwa—bwa yêyè awu.

⁶³ Bu mûndi ngeela meeji ne Yesu ngwâkambila Pilaatu, cintu kampanda, dîyì dîmvwà ngeela meeji, nenku Yêyè kwamba kwaba awu kukaavwa katanci ne: “Udi mukwambile aci nganyi?” Anyi ne: “Aci ncikubuulwila anyi? Wêwè mwine wâfikî ku dimanya biine bintu ebi bishi?” mu ngaakwilu mukwabo. Ncyêna mumanye mushindu menemene udi dîyì adi mpindyewu to, kukaadi ntanta mule kacya ngaadibala, kadi: “Wêwè mwine wâfikî—wâfikî ku dimanya ciine eci bishi? Cinyi? Munyi? Udi mukubuulwile ciine eci nganyi?” Pa cya ne Yêyè uvwa Mwânà wa Nzambi. “Udi mukubuulwileci nganyi? Mmuntu kampanda mukwambileci anyi? Anyi,” mwakamba Yesu, “n'Taatu Wanyi udi mu Dyulu mukubuulwileci?” Nwamonu anyi? Nwamonu anyi? “Udi muciyiile munyi, ncyà nkombo anyi ndibuulula dipwangane difumina kudi Nzambi?”

⁶⁴ Meesa a Mukalenge aa adi anu cintu kampanda cîndi nnseemena bwa kukumbaja, dîyì dituma, ngamba ne: “Ee, bakwabo nyawu bangata eci, nêncyângâtè paanyi” anyi? Ndibuulula dya ne mêmè ndi citupa Cyende Yêyè ne ndi citupa cyenu nwênù, ne ndi mununange nwênù ne muMunange Yêyè, nenku tudi twangata cyôci eci pamwe bu cimfwanyi cya dinanga dyetu bwa Nzambi, ne dinanga ne dyumvwangana dyetu dya muntu ne mukwende.

⁶⁵ Mpindyewu ndi muswe kubala ndambu mu Mifundu. Ne pashiishe ndi ngeela meeji ne. . .Mpenyi panudi. . .Mushindu wônsò udi Mwaneetu Pearry ujinga leelu ewu awu. Ndi njinga bwa nwênù kucibala pamwe naanyi, pawikala ne Bible webe. Kolinto wa Kumpala, nshapita wa 11, ne kubangila ku mvensa wa 23.

⁶⁶ Ne pashiishe kabidi, ku tabernacle wetu, tutu misangu yônsò twenza cyôci eci ne dyoweshangana dya mâyi ku makàsà, misangu yônsò, bwalu bidi byendela pamwe bikwatangane cyanza ku cyanza. Ngeela meeji ne mwaneetu mmumanyishe cyôci aci bwa “mu diisâtù diloolo” bwa misumba ya bantu ne bu munudi kanuyi ne. . .myaba mikumbane bwa kubwejamu bantu bwa dyoweshangana dya mâyi ku makàsà, nebênzè—nebênzè cyôci eci mu diisâtù diloolo.

⁶⁷ Mpindyewu, mvensa wa 23 wa nshapita wa 11 wa Kolinto wa Kumpala, teejeaayaaku Pôlô mpindyewu. Mpindyewu

nuvuluke, ne nulame eci mu meeji, Galatiya 1:8: “Twètù anyi mwanjelo ufumina mu dyulu munuyiishe evanjeeliyo mukwabo nansha yêyè wa bishi,” (kayi ewu Evanjeeliyo ukaavwaye yêyè muyiishe) “ediibwe mulawu.” Nwamonu anyi?

Bwalu ndi mupete kudi Mukalenge cîndî mêmè paanyi munusambulujile aci ne, Mukalenge Yesu mu bufuku bumwebumwe bwakamutungilabo abu wakangata dyâmpà:

Ne paakamanaye kusakidila, wakadicibula, . . . kwamba ne: Angataayi nudye: eci mmubidi wanyi, udi mucibudiibwe bwa bwalu bwenu: nwikale nwenza nunku bwa kumvuluka.

⁶⁸ Mpindyewu, lekelaayi ngănji kwimana anu mwaba ewu, bwa kwamba ne: anu dyangata dya mubidi wa Mukalenge Yesu Kilisto ku meesa a Mukalenge aa, kacyna ciswa kwamba ne meesa a Mukalenge awu adi mubidi wa Kilisto mwena dînà nansha. Aci mbwena Katolike. Mêmè ncyêna ngitabuuja ne aci ncyâ bushuwa to. Ndi ngitabuuja ne cidi anu mukenji cyanaana udi Nzambi mutwêlêlê, nwamonu’s, kî mmubidi mwena dînà to. Cidi . . . Mpindyewu, mu bulelela cidi anu kapese kaa dyâmpà dyosha mu cyena Yuda. Cidi anu mmukenji cyanaana.

⁶⁹ Anyi ncyêna ngitabuuja ne dibatiiza dya Yesu Kilisto (mu Dînà dya Yesu Kilisto) mu mâyi didi difwilangana luse ku mpekaatu to. Ncyêna ngitabuuja ne wêwê . . . Ndi ngitabuuja ne udi mufwanyine kubatiijiibwa dituku dijima . . . Mpindyewu, ndi mumanye ne kudi pâmwâpa bantu basòmbe kaaba aka bafumine mu ekeleeziya wa Cipostolo, ndi nswa kwamba ne, anyi église Pentecôtiste Unie, bwalu ke cidibo balongesha. Kadi, nudi numona, ncyêna—ncyêna ngitabuuja ne mâyi adi afwilangana luse ku mpekaatu nansha. Anyi, bu ne bivwa nanku, pa dîbâ adi’s Yesu wakafwa cyanaana. Nwamonu anyi? Mêmè ndi ngitabuuja ne cidi anu mmukenji wa Nzambi cyanaana, nwamonu’s, bwa kuleeja ne udi mufwidiibwe luse. Kadi kubatiijiibwa bwa difukuludiiibwa, to, ncyêna—ncyêna—ncyêna mêmè ngitabuuja aci to. Ncyêna ngitabuuja ne mâyi adi afwilangana luse ku mpekaatu to.

⁷⁰ Anyi mene ncyêna ngitabuuja ne dyâmpà edi ne mvinyo bidi bwalu neebe to, cidi anu dilama cyanaana dya mukenji udi Nzambi mutwêlêlê bwa twètù kwenza. Nwamonu anyi? Ncyâ bushuwa. Ndi ngitabuuja ne dibatiiza dya mu mâyi didi cintu cimwecimwe aci. Ndi ngitabuuja ne tudi benzejiibwe bwa kucyenza, bwa ne Yêyè ukaavwa mumane kucyenza cyònsò bu cileejiilu cyetu. Ne Yêyè wakenza cyôci eci bu cileejiilu cyetu. Ne Yêyè wakooweshangana mâyi ku makàsà bu cileejiilu cyetu.

⁷¹ Mpindyewu: “Bya mwomumwe kabidi,” mvensa wa 25:

Bya mwomumwe kabidi yêyè wakangata lupanza, ne paakamanaye kudya, wamba ne: Lupanza elu

ncipungidi cipyacipyu mu mashi anyi: nwikale nwenza nunku, misangu yònsò inudi nwènù nulunwa, bwa kumvuluka.

Bwalu misangu yònsò . . . (Vulukaayaaku mpindyewu!) . . . Bwalu misangu yònsò inudi nwènù nudya dyâmpà edi, ne nunwa lupanza elu, nwènù nudi nuleeja patooke lufu lwa Mukalenge too ne paalwaye. (Too ne dîbà kaayi? “Too ne paalwa Ye!” Nwamonu anyi? Nwamonu anyi?)

Ke bwa cinyi ewu yònsò wâdya dyâmpà edi, ne wânwa lupanza lwa Mukalenge elu, kayi mukumbanyine to, neikale mupiile ku mubidi ne mashi bya Mukalenge.

⁷² Lekelaayi ngânjì kwimana kakese. Kabingila kadiye mwambile bwalu ebu, nwamonu mu mwena mukwabo kaaba aka, nshapita mukwabo, mmwambe ne: “Ndi ngumvwa bamba ne panudi—panudi nudisangisha nutu nudya, nukwacikila mene too ne ku meesa a Mukalenge.” Bavwa bacyūmwè bibi, nwamonu’s. Bôbò bavwa badya anu budyavi naka, nwamonu’s. Anu mudi bantu benza leelu ewu, biikale anu ne nsòmbelu wa mushindu kana wònsò kadi kulwa kuàngata. Nwamonu anyi? Yèyè kwamba ne: “Nudi ne mbanza kunudi mwa kudiila, nwamonu’s. Kadi eci mmukenji udi ukengela twètù kulama, nwamonu’s.” Mpindyewu:

Kadi muntu adikenkete yèyè mwine, nenku adye dyâmpà, ne anwe lupanza.

Bwalu ewu udi udya ne unwa kayi mukumbanyine to, udi udya ne unwa dipiila dyende yèyè mwine, kayi ujingulula mubidi wa Mukalenge. (Nwamonu anyi?)

⁷³ Wèwè udi nganyi? Udi mwena Kilisto, ikala kumpala kwa bantu bònsò ne nsòmbelu wa mwena Kilisto. Kadi wèwè wangata aci kuyi ne nsòmbelu wa mwena Kilisto to, kwèna ujingulula Mubidi wa Mukalenge to. Udi uteeka dibwe dya cilendwishi mu njila wa muntu mukwabo, wamonu’s, padiye ukumona ukeba kwenza ciine aci kadi pashiishe kuyi ne nsòmbelu wùdi ne cya kwikala nende to. Wamonu’s, kwèna ujingulula Mubidi wa Mukalenge to. Mpindyewu tangilaayi cidì ciine aci . . . cidì mulawu wa cyòcì aci:

Bwa bwalu ebu bààbùngì mbatekete ne basaamasaama munkaci mwenu, ne bààbùngì bakaadi balaale tulù. (Nkudimwinu mwîmpè wa mwaku awu, Mwaneetu Peary, udi “bafwe.” Nwamonu anyi? Nwamonu’s, “bààbùngì mbafwe.”)

Bwalu bu twètù—bwalu bu twètù mwa kudilumbulwisha twètù biine, katwena bafwanyine kulumbulwishiibwa to. (Nwamonu’s, bu twètù mwa kudilumbulwisha twètù biine katwakulumbulwishiibwa to. Nwamonu anyi?)

Kadi patudi tulumbulwishiibwa, tudi tunyookiibwa kudi Mukalenge, bwa katulu kupiishiibwa pamwe ne baa pa buloba. (Nwamonu's, kakuyi dilamakana nansha dikese ne baa pa buloba to.)

Ke bwa cinyi, bânà beetu, panudi nudisangisha bwa kudya, indilanganaayi muntu ne mukwende. (Nwamonu anyi?)

Ne padi muntu ne nzala, adiile kwende kumbelu; bwa nwênù kanulu kudisangisha bwa dipiila. Nenku bwa bidi bishaala nêmbitèèkè mu bulongame pângààlwà. (Nwamonu anyi?)


⁷⁴ Mpindyewu, mu ngaakwilu mukwabo, kanwikadi nulwa kuàngata anu bu. . . Bu mûngãmbi katanci aka, pa bwalu bwa beena Yuda, mulambu wabo, bavwa. . . Uvwa mulenga be, wakafidiibwa kudi Nzambi, kadi byakafika mu mushindu wa kabaciyi bawenza ne meeji matooke ne kaneemu ne bulongame to, pa dîbà adi kulwawu anu. . . Kulwawu—mupuuya mubole mu dyûlù Dyende.

⁷⁵ Mpindyewu, cintu cimwecimwe aci cidu ku dilwa dyetu bwa kwangata kwa didya dya Mukalenge, ne, tudi ne cya kulwa biikale bamanye citudi twenza. Anu bu mudibi paudi ubwela mu mâyi bwa kubatijiibwa mu Dîna dya Yesu Kilisto, udi mumanye cyûdi wenza, udi uleeja patooke kudi ekeleeziya cidu Nzambi muteeke munda mwebe, Kilisto.

⁷⁶ Patudi twangata cyôci eci, cidu cileeja ekeleeziya, ne: “Ndi mwitabuuje Dîyi dya Nzambi dyônsò. Ndi mwitabuuje ne Yèyè udi Dyâmpà dya Mwoyi dyakafuma kudi Nzambi dipatukile mu Dyulu. Ndi mwitabuuje ne Dîyi dyônsò didiYe wamba didi Bulelela. Ne ndi ne mwoyi ku Dyôdi, ku dyanyi paanyi dimanya dyônsò, Nzambi mwikale Mulumbulwishi wanyi. Ke bwa cinyi, kumpala kwa bânà beetu baa balume, kumpala kwa bânà beetu baa bakaji. . . Ncitu—ncitu ncipa to, ncitu ngeela milawu to, ncitu ngenza bintu ebi to, bwalu ntu munange Mukalenge, ne Mukalenge mmucimanye ne utu umfidila bujaadiki. Ke bwa cinyi, kumpala kwenu, ndi ngangata kapese kaa mubidi Wende, bwa kumanya ne ncyêna mupiishiibwe ne baa pa buloba to.” Nwamonu's, ke bwalu mbwabu, pa dîbà adi cidu ndibenasha.

⁷⁷ Nenku, vulukaayi ne, ndi mufwanyine kufila majaadiki àbûngi pa bwalu ebu, mûndi mwangate cyôci aci mucyûmvwije mu cibambalu kampanda cya babeedi, ne mubamone bondopiibwe.

⁷⁸ Vulukaayi ne, paakangata Izaleela cimfwanyi cya cyôci ciine eci, baakenza lwendu lwa bidimu makumi anaayi mu cipeela bilâmbà byabo kabiyiku mwa kusunsuka to, ne baakapatuka kakuyi muntu wa butekete nansha umwe—nansha umwe munkaci mwabo, ne bantu miliyô ibidi bu cimfwanyi cya cyôci eci. Ee, Cintu cyena diinà necyênzè cinyi? Piikalabi ne mubidi

wa nyama wa mulambu wakabenzela cyôcì aci, Mubidi wa Yesu Kilisto, Emanuwele, mmufwanyine kutwenzela twêtù cinyi? Twikalaayi anu mu kaneemu patudi tulwa. Twikalaayi anu mu kaneemu ne mwetu mwônsò, bwa kulwa. 

MÈÈSÀ À MUKALENGE LUA65-1212
(Communion)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu diloolo, mu matuku 12 a ngondo wa dikumi ne mwibidi, cidimu cya 1965, mu Tucson Tabernacle mu Tucson, Arizona, U.S.A. Ndyumusha pa mukaba wa mêyi ne dituuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2017 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org